




初唐四傑集

王子安集

丙

初唐四傑集
十
三

土岐文庫
文庫17
W54
3



文庫 17
W54
3



王子安集卷十二

頌

九成宮頌 并序

臣聞在天垂曜璿宮列乾象之墟在地班形珠闕鎮坤
靈之野洎夫三精駟運卽寥廓而為宮九聖旋游遍洪
荒而可宅則有瑤房玉室崑山分太帝之庭金屋銀臺
滄海擢元元之宇豈非神明其道騁仙轡於無垠浩蕩
其居示清都於不宰若夫扁牖六合奔走八神占日月
而揆山川駕陰陽而法天地非聖人其孰能與於此乎

010285191350

昭和六十年二月一日
土岐善吉唐氏寄

至若文開遁甲仇峰城蒼后之躔樂奏鈞天峒嶺駐黃
軒之駕業融環堵下姑射而尋真道濟巖廊望衡山而
展事斯則三階遍下唯臨布政之宮六位時乘未覩巡
方之節其後兩龍齊驚抗瓊闥而同嬉八駿高驤指瑤
池而結興殷風不競砂邱雄別館之娛秦道無章雲閣
徇殊庭之賞於是功虧大壯頌闕祈招豐屋同忘危醜
繼及遂使來年候跡名山爲縱觀之場竝海遵一作河
沃野盡行宮之地皇天震怒於上蒼黎眈慟哭於下土
其有斟酌于古文明一代蒿宮不陋茨山可仰祈誠東

岳唐帝復衢室之尊用饗西岐天子合鈞臺之運得其
道也蓋有存焉國家梯霄架極罄域裁基纂高邱白雲
之裔鬱函都紫氣之兆宸扉旣闢一宇宙而來王聖籙
潛躋貳乾坤而作帝高祖天旗夜立制黃馬而先驅太
宗日馭晨飛驂綠蟠而首出雖立極承祧之業進燭前
文而重光累洽之符歸功下武陛下承靈太乙踵睿登
三星虹沓祉電虬發慶丹書碧篆神符煥河洛之文玉
斗珠衡天骨挺皇王之表用能捨桐圭而宣七鬯肅玉
籍而揖宗祧寫靄九天騰景萬里御風雷七曜於上博

臨之功顯用山川六府而下輔相之宜得元宮密運敷
造化於靈襟黃屋神凝創經綸於寶思鳳闈宵靜陰靈
宣玉閭之華鶴禁朝趨離象峻銅樓之景川分帝子控
鯤壑而疏源岳動天孫擁熊山而列鎮其化成也如彼
其強幹也如此猶乃停旒正室嚴纘中軒玉階匪泰金
門爲險佇虹旃於月澗岳瀆生光飛鶴蓋於烟臯江湖
動色桃溪逸彥塞丹井而歸風松磴遺英斬元關而奉
制位兼河海九卿參巨濟之功道合星辰三事鬱經天
之象朱轡緝化泣故老於中溪墨綬宣風繞春童於上

陌王化之基已洽天工之代有序建銅儀而測曜象緯
齊懸按璿璣而書雲禎氛疊舉祥噦十二紫鵠調夏谷
之音大禮三千頽虵應黃鍾之曲蠶功順令業著於青
裳蜃磨迎春恩周於黛耜黃砂靜讞爽鳩興頓足之悲
丹石銷寃神獬輟摧鋒之計詠時和於帝壤動植咸驩
歌道泰於華封昆蟲自樂星墟列將輝玉節而長驅天
策神兵下金壇而決勝橫麾赤坂葱山成不戰之郊命
繳青邱桃野見其亡之兆烟馳火激勵珠崖而移琛雪
驚冰洲駕瑤谿而納賚乾坤徑復載遵赤縣之封曦望

環周末出黃圖之域故夫含吐萬物至功也制平八表
 大業也一陰一陽神道也乃文乃武聖圖也用能使天
 不愛寶地不藏珍日月五行風雲四序龍章鳳彩鳥奕
 於郊墟黃鉉紫玉磊砢於垆圉集風雲於翠蕙浴甘露
 於朱英澤馬飛鑣山輿結轍殊徽狎至祥書竭東郭之
 毫累譯同歸朝冊盡南山之竹然後瑤壇備物陳帝服
 而展皇儀石室疇庸登太山而小天下功宏事畢狹廣
 宇而三遷風舉雲搖歷神都而一憩考遺基於汶上稽
 故典於淹中光總章之瑞紀嗣乾封之寶歷大矣哉昇

中作睿握四海而為尊則大斯謨

一作

肇三宮而配承

憑太室而高視靈壇八百坐明堂而恭已諸侯一萬時
 既貞矣襄城辭訪道之遊功既成矣元圃頓尋仙之駕
 繇是南宮奏議和元禁而成章西上謳歌指皇輿而佇
 眷咸以珍臺觀穆陽靈開避暑之室清序鈞調景福制
 追涼之殿然則高棟深宇威神之宏節也順氣發生巡
 遊之大功也况乎石城金室偏與井鬼之區珠藪瑤池
 宛在秦幽之境應雷耕而出豫蒼帝其時面炎馭而思
 和朱明不遠雖途吟野怵黎元忻望幸之符而屈已從

人天子下勞謙之詔候離局而從宴尚惕三危清近縣
而移鑾猶詳再駕以爲三十六所帝劉非舜禹之心四
十二宮全趙異成康之歷詠荆臺而夕厲思蒲坂而晨
凝方奉後天之期俯順觀風之請萬靈禋社三辰合慶
姬文考筮容成奏日千旌鳳轉儼鏤象而星陳萬騎龍
嘶代靈鼉而曉徹靜帷宮於綠野肅帳殿於黃街奔櫬
槍而走陸梁陳浮靈而候明月前驅電竦下列缺於騰
鞭後乘雷驚起豐隆於驟轂瓊戈晝洒大陽疲轉日之
鋒玉劍宵翻懸象睹衝星之氣天旋霧散岳運川迴林

兵護野方神啟路黃麾紫蓋雜精氣而西浮雲動神行
背封巒而右指吐霧馳風以臻夫九成宮禮也爾時峰
橫地乳景戴天麋分闔井而圖基蔭秦星而耀陟靈墟
寶藏代興汧雍之間峻阜長岑疊鎮岐梁之域丹溪碧
洞吐納虹霓灌柏叢篁騰遷雨露獲秦餘於故兆地擬
林光訪周舊於遺風山連水滸前趨劍棧玉壘千尋傍
望斗城金墉萬仞架陰邱而北走境瞰鄜祠分沓嶂而
西馳塗交隴坂仙都密邇猶連上苑之扃靈宮巋然直
透崇岡之曲卽礪基於礪道利在斯千固拱木於虞衡

規同匪日彌峰跨谷層城萬轉歷險乘危迴廊四注山
祇盡石出微道而終年風伯羸糧半長途而中宿架千
樓而楸極爛若神扶羅萬戶而窺天魏如化立離堂早
照皦日籠光於綺寮合殿宵深歸雲納影於重廡琅房
砥室畫栱相望綠岫紅巖雕櫳間出元熊蝻蛭俯棟宇
而危心青鳥歸飛仰靈軒而墜翼轉飛檐於秀嶠上出
重冥蔭反宇於迴谿下臨無地紅葩紫葍垂劍井而披
文金鎖銀鋪接重局而炫色儼鈎陳於漢陌秦階非遠
設陛戟於烟莊仙梯可陟華璫壁散掛明月於崇朝密

網珠連落奔星於巳曙丹樑發秀彩沓虹文皓壁凝鮮
光含蜃氣銅龍對霄接飛泉而瀑流鐵鳳連薨遡還颯
而佇立雖南躔統序北宮開榮凜勁氣於叢楹起淒風
於洞穴竣烏失轡出澗戶而無光金兔低輪下山扉而
變色陰庭阻夏祝融無竊據之因邃屋乘春頤頊定忘
歸之策飛廉扣響赴北闕而神寒屏翳收津跼南端而
股戰蒼蒼八桂白露爲霜落落千松元陰昧景金人列
陛來危砌而思裘玉女窺牕伏層巒而請纒陽秋代駕
不凋仙圃之華天地爲鑪未解幽陵之凍至若氣清乾

步景霽山維栖翠靄於崇榮列朱霞於複榭瓊枝累道
彩綴文槐碧樹周阿光搖鏤檻靜簾帷而洞啟穆羽相
和肅坻堦而天臨纖塵不動宸儀有睟蓬萊與城闕俱
榮羣后多歡薜蘿共簪裾合賞巖花落砌綴龍展而成
文嶂葉交軒拂鸞旗而追影鑪峰轉靄香傳玉几之風
石瀨鳴湍響入銅壺之水乃有陵陽駕鶴奉丹墀而稱
臣子晉吟鸞下青蒲而謁帝箕精失耀傳說泰命於東
廂昂宿低芒庭堅奉職於西序三臺九署雲端極目霓
裳風髻闕下相尋張良卧疾攀赤松而有地綺季來朝
歌紫芝而忘返若夫功成盱食道濟宵衣漢宮追聽覽
之餘堯殿得巡來之隙霞登月憩光睿幸於彤闈玉振
金聲藻宸章於翠掖洛陽才子承閒盡宣室之談蜀郡
詞人還奏動甘泉之賦復有軒庭十四出桂闥而乘茵
永巷三千望椒塗而奉幣翊鸞臺之廣宴扈駕砌之仙
遊羅綺芳兮四面春環佩鳴兮九重暮風閨夕做攜少
女於歌筵月幌宵朧下姮娥於舞席元房埃宴雲姬辭
豹尾之歡紺幄承顏星媛入魚鱗之戲若乃屯營櫛比
對閣道而斜趨解寺基分混文昌而外屬周朝瑞鸞聲

參叶律之宮陳寶鳴雞響雜司晨之序名都廣會閭閻
萬家帝籙仙垣亭臬千里山村野塾家連菌草之園谷
飲川居戶有桃符之水故夫恩加草樹園原澤而無私
道被翔行苑山川而不禁每至旻天戒序高風嘯律虞
官獻秋獮之儀司馬奉梁騶之典將軍布卒略元潮而
東馳都尉關營繞黃山而北睇於是逢蒙列階蚩尤並
轂材官發射期門走仞仗元麾而直指鸚視千羣奮朱
鬣而橫行龍驤萬計層旗廣旆出宇宙而三驅疊鼓鳴
鐘運雷霆而一呼前旌逐日夸父斷洪河之流後騎超

山共伯挾崑崙之柱近陵吐焰縛奔電於長鋒灌莽生
塵隕飛霜於勁鏃合戈鋌而照地猛兕知窮振罟網而
籠天騰龍失據崩林礫石毛羣無挺險之資蔭澤風山
羽族落垂雲之影長圍躩蹠得駿馬於秦垓大輅徜徉
載飛熊於渭浦然後還師振旅考事陳功皮軒按節牙
璋復路視餘生於大野誓廣校於長陬班腥於截薛之
墟省蜡於長楊之館命奔烽而舉醕火照甘泉總輕騎
而行庖雲驚上路聲兼萬籥歌鐘空廣樂之庭禮被三
雍玉帛盡塗山之會龍胎鳳卵入禹膳而調芳石乳瓊

漿委堯樽而湛色恩霑下帛宴液仙宮雖大夫思濯鵠
之歡而天子可迴鸞之奏然後拜釐清廟考德齋宮用
元功而不有宅太虛而無迹動崇易簡規萬祀而化黃
金道貫幽明徵百靈而饗丹甌得元珠於舜海尙警冰
危朗天鏡於堯儀猶勤日昃虔恭上帝東朝懸待諫之
旌清問下人南面聽登聞之鼓則有郊童俟蹕敢讓天
師野老排闥唯歌帝力風行比屋忠臣收折檻之謀化
溢康衢良使息埋輪之請設神規而動俗庶績其凝握
元符而發祉殊方合應華胥已泰濟羣生於不死之庭

閭閻可觀致仙歷於無窮之境蕩蕩乎發育萬物而顯
諸仁洋洋乎包舉六氣而藏諸用均兩儀而得一恥三
皇而不四者矣臣勃東皋賤節北阜幽姿常叨召見之
恩驟玷明敷之列書生謁相望闕推輪下客遊梁榮參
賜帛終童立志空投函谷之繻馬令同時未給尙書之
筆雖元機妙鍵已寂兆於忘言而詠德陳功請追聲於
匪頌其詞曰

九門浩蕩三山超忽帝坐金房仙成玉闕浮丹麗紫棲
霞冠月真匠難徵虛談易越其旋窺鳳紀極睇龍墳層

巢化没上棟爻分茅宮蔽雨松殿來雲猶述匪陋尚缺

斯文其二道倫明一風遷繼五禮讚三宮詩歌百堵黃圖

未洽紫庭無輔局促墉垣逡巡度矩其三盛衰環襲冲盈

舛驚璿宇夏關瑤局殷樹奢窮地絡毒流天步相日遄

奔尋雲速仆其四災延六國運逼三川分雄競侈禮僭圖

全飛薨月徑列廡霞阡乾谿敗楚碣石亡燕其五阿房秦

構文軒五里建章漢立仙闈萬祀詭代齊徑一作違天

縱已望夷有釁甘泉不祀其六宛郊嗣錄譙鄉警眾蜀跨

梁岷吳吞楚夢相宜裁軌崇楹累棟雲闕同華泉臺罕

共其七晉圖終否胡風肆極霧黷丹圍塵埋紫域皇階不

守帝庭無色帳殿相臨瓊牆間飾其八南承有宋北洎亡

隋功慚戶隔守在城池樓船水覘車陣山窺吳庭再毀

代鼎三移其九火德初融江陽振旅奄收淮船遂朝吳渚

象錯驕秦龍舟壞楚雄圖乃溢傾宮不處其十海岳呈華

風雷寫慶翦諸戎首光我靈命紫氣雲蒸黃星月映輔

商為業遵唐啟聖其十一景闕丹繩祥抽翠籙格天垂範

模神驚躅朱極重光黃離繼旭道清金鏡時和玉燭其十二

二徵規鳳闈毓訓鸞闈桐宮宿列桂邸霞飛台精變道

岳耀裁幾朝盈振鷺境比馴其十武韜弓矢文經步

驟爽鳩議獄龍師掌奏玉帛華夷提封宇宙譯書歲款

祥圖月湊其十四帝功得一乾元用九鏤玉天齊塗金社

首神京四邑明堂八牖燮而可大為而不有其十五層宮

望幸堯封佇悅伺隙披圖乘時徙轍赤騮俟駕蒼虬按

節月車宵移星闈曉列其十六方神護野岳將清塗迴麾

嶠路逗蹕山樞千靈電驚萬辟風趨釣臺有問峒岫無

虞其十七五城分秀雙巒抗影畫棋彌峰雕甍巨嶺烟閨

夜謐雲房晝靜竹殿栖寒松軒祕景其十八紫庭晨御彤

闈早闢天子凝旒辟公奉璧薜蘿齊致簪裾混迹仙鶴

隨輪靈鳧墜鳥其十九風扇濬敞震廊藻邃玉網星開金

鋪月墜山樓獸矯雲臺鳥次複嶂披丹迴流轉翠其二十

仇夷聖宅姑射神心樂翔丹鳳使引青禽羲壇葉暗禹

洞花深沼分瑤水苑跨珠林其二十一順時宣節分戎講將

星騎朝飛雲羅夕張寶雞獲祉非熊入貺駕掩岐蒐禮

高秦望其二十二艷庭未遠塗山有戮襄野逃軒清都宥穆

罕夷乾步徒豐帝屋光總大猷允歸天祿其二十三合宮垂

訓靈臺韻雅功映寰中頌流天下皇圖已泰鴻筆難假

帝有力焉惡非能者其二十四

贊

平臺祕略贊

孝行第一

受訓椒殿承輝桂闕資父事君自家刑國孝惟忠本忠
隨孝得履薄臨深惟王之則

貞修第二

列藩好德清修互起峻局剛情中孚素履道契元極芳
圖青史為善不同同歸於美

藝文第三

榮分上邸業盛文場爭開寶札競聳雕章氣凌雲漢字
挾風霜後之來者其在君王

思武第四

原缺

善政第五

榮開社稷業照旂常是恢藩化或固朝章功成道洽身
歿名揚唯忠與孝千載生光

尊師第六

奔霆易駭巨壑難遊主明臣直撫類相求道行言用性
逸神休吁嗟盛軌從善如流

褒客第七

功惟應物業貴逢時君王樂道上客含詞情起月肆興
入烟遠文林辯囿何代無之

幼俊第八

列后雲騰英童霧躍年妙識遠理豐詞約寵照玉旗文
先銅爵勿踈小善方恢大畧

規諷第九

寵榮有極恭冲是守軸碎羣毛金銷衆口全忠衛國順
時藏垢周之宗盟異姓爲後

慎終第十

具覽藩猷遐窺國篆罕兼百行多褒一善履忠存性慎
終思遠生榮死哀身歿名顯

世風之宗... 批

番禺林國廣初校

王子安集卷十三 番禺沈葆和覆校

王子安集卷十三 策與世園之類典

碑以... 益州夫子廟碑

述夫帝車南指遁七曜於中階華蓋西臨藏五雲于太

甲雖復星辰蕩越三元之軌躅可尋雷雨沸騰六氣之

經綸有序然則撫銅渾而觀變化則萬象之動不足多

也握瑤鏡而臨事業則萬幾之湊不足大也故知功有

所服龜龍不能謝鱗介之尊器有所歸江漢不能竊朝

宗之柄是以朱陽登而九有照紫泉清而萬物睹粵若

宗之柄是以朱陽登而九有照紫泉清而萬物睹粵若

皇靈草昧風騷受河洛之圖帝象權輿雲鳳錫乾坤之
瑞高辛堯舜氏歿大夏殷周氏作達其變遂成天下之
文極其數遂定天下之象衣冠度律隨鼎器而重光玉
帛謳歌反宗禋而大備洎乎三川失御九服蒙塵俎豆
喪而王澤竭鐘鼓衰而頌聲寢召陵高會諸侯輕漢水
之威踐土同盟天子窘河陽之召三微制度乘戰道而
橫流千載英華與王風而掃地大業不可以終喪彝倫
不可以遂絕由是山河朕兆素王開受命之符天地氤
氲元聖舉乘時之策興九圍之廢典振六合之頽綱有
道存焉斯文備矣夫子姓孔氏諱邱字仲尼魯國陬人
也帝天乙之靈苗宋微子之洪緒自元禽翦夏俘寶玉
于南巢白馬朝周載旌旗于北面五遷神器琮璜高列
帝之榮三命雄圖鐘鼎冠承家之禮商邱誕睿下屬于
防山泗水載靈遙馳於汶上禮樂由其委輸仁義所以
來蘇排禍亂而構乾元掃荒屯而樹真宰聖人之大業
也若乃承百王之丕運總千聖之殊姿人靈昭有作之
期嶽瀆降非常之表珠衡玉斗徵象緯於天經虎踞龍
蹲集風雲於地紀亦猶三階瞰月恒星知太紫之宮八

柱衝霄羣嶺辨中黃之宅聖人之至象也若乃順時而
動用晦而明紆聖哲於常師混波流於下問太陽亭午
收燭火於丹衡滄浪浮天控涓涔於翠渚西周捧袂仙
公留紫氣之書東海摳衣鄒子敘青雲之秩接輿非聖
詢去就於狂歌童子何知屈炎涼於詭問聖人之降跡
也若乃參神揆訓錄道和倪辱太白於中都絆乘黃於
下邑湛無爲之跡而眾務同并馳不言之化而羣方取
則雖復霓旌羽旒齊人張夾谷之威八佾三雍桓氏逼
公宮之制泊乎歷階而造宜武備而斬俳優推義而行
肅刑書而誅正卯用能使四方知罪爭歸舊好之田三
家變色願執陪臣之禮聖人之成務也若乃乘機動用
歷聘棲遑神經幽顯志大宇宙東西南北推心於暴亂
之朝恭儉溫良授手於危亡之國道之將行也命道之
將廢也命歸齊去魯發浩歎於衰周厄宋圍陳奏悲歌
於下蔡聖人之救時也若乃筐篚六藝笙簧五典折旋
洙泗之間探賾唐虞之際三千弟子攀睿化而升堂七
十門人奉洪規而入室從周定禮憲章知損益之源反
魯裁詩雅頌得絃歌之旨備物而存道下學而上達援

神敘教降赤製於南宮運斗陳經動元符於北洛聖人
之立教也若乃觀象設教法三百八十四爻四十有九
窮神知化應萬一千五百五十有五成變化而行鬼神
觀陰陽而倚天地以鼓天下之動以定天下之疑索眾
妙於重元纂羣微於太素聖人之贊易也若乃靈襟不
測睿視無涯石罅昭集隼之庭土缶驗羶羊之井嵇山
南望識皓骨于封禺蠡澤東浮考丹萍於夢渚麟圖鑒
遠金編題佐漢之符鳳德鉤深玉策筮亡秦之兆聖人
之觀化也時義遠矣能事畢矣然後拂衣方外脫屣人

間莫楹興夕蓐之災負杖起晨歌之跡撓虹梁於大厦
物莫能宗摧日觀於魯邱吾將安仰明均兩曜不能遷
代謝之期序合四時不能革盈虛之數適來夫子時也
適去夫子順也爲而不有用九五而長驅成而勿居撫
雲霓而高視聖人之應化也自四教遠而微言絕十哲
喪而大義乖九師爭大易之門五傳列春秋之輻六體
分於楚晉四始派於齊韓淹中之妙鍵不追稷下之高
風代起百家騰躍攀戶牖而同歸萬匠驅馳仰陶鈞而
共貫猶使絲簧金石長懸闕里之堂荆棘蓬蒿不入昌

平之墓聖人之遺風也導揚十聖光被六虛乘素履而
保安貞垂黃裳而獲元吉故能貴而無位履端于太極
之初高而無人布政于皇王之首千秋所不能易百代
所不能移萬乘資以興衰四海由其輕重雖復質文交
映瞻禴祀而長存金火遞遷奉琴書而罔絕蓋易曰觀
乎人文以化成天下又云聖人以神道設教而萬物服
焉豈古之聰明睿智神武而不殺者夫國家龔宇宙之
淳精據明靈之寶位高祖武皇帝以黃旗問罪杖金策
以勞華夷太宗文皇帝以朱翟承天穆玉衡而正區宇

皇上宣祖宗之累洽奉文武之重光稽歷數而坐明堂
陳禮容而謁太廟八神齊饗停旒太史之宮六辯同和
駐蹕華胥之野文物隱地聲名動天樂繁九俗禮盛三
古冠帶混并之所書軌八紘閭閻兼匝之鄉煙火四極
竭河追日夸父力盡於楹間越海陵山豎亥塗窮于廡
下薰腴廣被景貺潛周乾象著而常文清坤靈滋而眾
寶用溢金膏于紫洞雨露均華栖玉燭於元都風雷順
軌丹萸翠菌藻繪軒庭鳳彩龍姿激揚池籞殊徵胥蠻
不召而自至茂祉昭彰無幽而不洽雖復帝臣南面降

衢室而無爲岱畎東臨陟名山而有事靈命不可以辭
也大典不可以推也由是六戎宵警橫紫殿而縱金五
校晨驅蹴元雲而噴玉星羅海運嶽鎮川渟登碧墀而
會神祇御元壇而禮天地金箱玉冊益睿算于無疆玳
檢銀繩著靈機於不竭功旣成矣道旣貞矣歷先王之
舊國懷列聖之遺塵翔赤驥而下雲亭吟翠虬而望鄒
魯泗濱休駕杳疑汾水之陽尼岫凝鑿暫似峒山之典
乃下詔曰可追贈太師託鹽梅于異代鼎路生光寄舟
楫於同時泉塗改照咸亨元年又下詔曰宣尼有縱自

天體膺上哲合兩儀之簡易爲億載之師表顧惟寢廟
義在欽崇如聞諸州縣孔子廟堂及學館有破壞并向
來未造生徒無肄業之所先師闕奠祭之儀久致飄零
深非敬本宜令諸州縣官司速加營葺九隴縣學廟堂
者大唐龍朔三年鄉人之所建也爾其州分化烏境屬
蹲鴟縈錦室于中區託銅梁於古地玉輪斜界神龍蟠
沮澤之雲石鏡遙臨寶牒祕禺山之影天帝會昌之國
上照乾維英靈秀出之鄉傍清地絡庠序由其糾合纓
弁所以會同文翁之景化不渝智士之風猷自遠於是

雙川舊老攀帝獎而翹心三蜀名儒想成均而變色探

周規於舊宅詢漢製於新一作都開基於四會之躔授

矩於三農之隙土階無級就擊壤於新歡茅茨不翦易

層巢於故事莊壇文杏卽架椽樂夾谷幽蘭爰疏戶牖

儀形莞爾似聞沂水之歌列侍間如若奉農山之對緇

帷曉闢橫紺帶於西河絳帳宵懸聚青衿於北海雖秋

禮冬詩之化已洽於齊人而宣風觀俗之規實歸於上

宰銀青光祿大夫譙國公諱崇義大武皇帝之支孫河

間大王之長子高秋九月振玉贊於唐邱寶算干齡躍

璇蚪於大渚我國家靈命東朝抗裘冕之尊宗子維城

南面襲軒裳之重析元元之允緒擁朱虛之祿位拜玉

節於秦京輝金章於蜀郡元機應物潛銷水怪之灾丹

筆申冤府絕山精之訟魏文侯之擁篲道在而謙尊董

相國之垂帷風行而俗易司馬宇文公諱純河南洛陽

人也皇根帝緒列五鼎于三朝青瑣丹梯跨千尋於十

紀仲舉澄清之轡未極夷塗土元卿相之材先登上佐

冰壺精鑒遙清玉壘之郊霜鏡懸明下映金城之域縣

令柳公諱明字太易河東人也梁岳之英長河之靈沐

雲漢之精粹荷天衢之元亨旌旗赫奕於中古珪組陸
離於下葉鳳巖抽律擢層秀於龍門驪穴騰姿吐榮光
於貝闕自朱絲就列光膺令宰之榮墨綬馳芬高踐郎
官之右仙鳧旦舉影入銅章乳翟朝飛聲含玉軫臨邛
客位自高文雅之庭彭澤賓門猶主壺觴之境曠懷足
以御物長策足以服人重泉之惠訓大行單父之謳謠
遂遠猶爲夏絃春誦俗化之樞機西序東膠政刑之根
本上祇朝憲下奉藩維爰搜複廟之儀載闡重欄之制
三門四表煥矣維新上哲師宗肅焉如在將使圓冠方
領再行鄒魯之風銳氣英聲一變賓渝之俗於是侍郎
幽思摛鳳藻於瓌林丞相高材排龍姿於璧沼遺榮處
士開簾詮孝悌之機頌德賢臣持節聽中和之樂其爲
政也可久其爲志也可大方當變化台極儀刑萬宇豈
徒偃仰聽事風教一同而已哉勃幼乏逸才少有奇志
虛舟獨泛乘學海之波瀾直轡高驅踐詞場之闔闕觀
質文之否泰眾矣考聖賢之去就多矣自生人以來未
有如夫子者也嗟乎今古代絕江湖路遠恨不得親承
妙旨攝齊於游夏之間躬奉德音攘袂於天人之際撫

身名而永悼瞻棟宇而長懷嗚呼哀哉敢為銘曰

五帝既歿三王不歸地震動陰陽亂飛山崩海竭月

缺星圍禮樂無主宗禋遂微其大哉神聖與時迴薄應

運而生繼天而作龍躍浩蕩鵬飛寥廓奄有人宗遂荒

天爵其尼山降彩泗濱騰氣志匡六合神經萬類夾谷

登庸中都歷試睿情貫一元猷絕四其栖遑教跡寂寞

河圖違齊出宋歷楚辭吳風衰俗壞禮去朝蕪麟書已

卷鳳德終孤其杳杳靈命茫茫天秩吾道難行斯文易

失式宣六藝裁成四術虛往實歸外堂內室其邈矣能

仁悠哉化主力制羣辟權傾終古陸離彩燦蟬聯茅土

涉海輕河登山小魯其皇家載造神風四極檢玉題祥

繩金署德聿懷聖跡同享天則乃眷台庭爰升袞職其

玉津同派金堤茂版智士風高文翁澤遠毗涪壤沃聲

和俗愿載啟仁祠遂光儒苑其沈沈壺奧肅肅扃除靈

儀若在列配如初槐新市密杏古壇疎楹疑置奠壁似

藏書其泛泛寰中悠悠天下徇名則眾知音蓋寡硯石

參瓊迷風亂雅仲尼既歿夫何為者其

彭州九隴縣龍懷寺碑

粵若真元混沌抱一氣於天門象化童蒙構三靈于地
戶由是金城逆順山河假成器之因玉燭沈浮風火兆
流形之藁懸大明于日月適滯泉宮設巨浸於雲雷終
迷燬宅太極所以散而爲兩洪颯所以吹而爲萬雖復
卑高異列俱沈方內之遊彙集橫流共失環中之契豈
夫涅槃深視不背色以求真般若長驅每乘空而得靜
則知一名同出陰陽爲破道之墟萬象皆空天地卽降
魔之境矣莫見其俯仰不知其去就至自於太虛復歸
於無物其建言立德開業成務握大柄而推造化執洪
鑪而誥元始四門幽闢顧非相而遲迴三駕晨嚴臨有
爲而出頓豈不知羈孤長路終嬰旅泊之虞舟楫中流
未釋風濤之苦將以宅心者寂虛室所以合符應物者
神明鏡由其不倦故能商榷宇宙指麾權實演羣生而
非其力存庶品而非其有干巒閉景似居蓬艾之間雙
闕臨空若在江湖之上其釋迦之沖用乎龍懷山者井
絡之所交會岷隅之所控帶攢峯北走吐香嶂於元霄
巨壑南馳歎洪濤于赤岸香城寶地左右林泉碧岫丹
岑往來煙雨時有法會禪師者俗姓褚氏吳郡錢塘人

也金章錫美河陰傳九命之尊玉鉉乘榮江左受三台
之貴地靈人傑自朔野而重光學府文宗冠南都而獨
秀法師紫星降彩紅雲受氣應積善於高門契冥緣於
累世果浮觴引潛圖彼岸之功聚礫延砂卽揆爲山之
業靈樞密運闢仁路而長鳴慧刃高揮斬邪關而洞照
以爲真機體化毫髮莫滯其真執數逐微乾坤不容其
算於是四禪幽觀破銅堞而出無明三昧雄圖排鐵圍
而泯非相法雲自在吐納龍宮賢聖不仁奔馳象域將
使三千塔廟知真實之元津萬億幡幢入空虛之祕藏

安心樂土遯影靈關以開皇元年憩於茲嶺靈墟福地
已被神功玉榜金繩未光朝命蜀王秀以文昭建國帝
子專征仗巴服之尊名裂印荒之寶命彤駢僭帝蹕萬
騎於銅梁皂蓋圖王警千乘于玉宇鏡山南望志狹彭
渝錦水西浮恥朝江漢開寶沈之壁壘嘯京叔之風塵
擁龜堞而託殊方憑爵堂而傲天子威權所制勝兵數
十州雄視所臨經塗五千里三英賦雪瞻秋月於梁臺
八叟吟風傳朝雲於楚館思宏正法廣召名僧振錫雲
趨乘杯霧合禪師括囊泉石韜跡煙霞攀紫桂而同塵

守青蓮而向晦衝飄蕩岳寧移忍地之靈烈火焚山不
撓堅林之色王心有悟時加優禮順風拜道封山謝失
發淨財於廣內揆仙室於重幽因嶂爲壁憑崖列戶以
開皇五年始賜額爲龍懷寺地隣縣左遂均縣上之恩
山似龍盤卽建龍懷之刹爾其崇巒經復復礪縈迴高
邱洩雲長林翳日增瓊垣於下麓揆瑤構於中巖香闕
神行珍臺妙立玉蚪銜靄絕游氣而負蒼天金鳳連薨
排烈風而瞰元圃延綠房於疊巘上拂霞莊蔓丹闕於
重溪下披泉戶陽開陰闔變霜露於旋迴螻動螟飛起
雷霆於顧指玉堂朝亘影襲長虹珠殿宵浮光含列宿
禪師歿後爰有孝恭法師智開法師宏嚮法師寶積闍
黎四上人者並禪師之上足而法門之領袖也五明衢
路控引情宮八解源流朝宗性海其深爲寶拔白玉於
嶄巖無礙居真得元珠於象罔住持真界栖息妙塗俱
探寂滅之源各證菩提之域雖業定人境照已極於無
方而道寄生成功遂覃於有相演中乘之奧義增上棟
之宏規萬栱不騫千門有闕俄而帝隋大去皇家小往
天地閉而賢人隱雲雷屯而巨寶衰毒龍橫霧四天沈

暗逆之悲醉象驅風三界溺崩離之酷上人慧機幽晤
定識潛融知佛日之恒明審王風之尙靜芝歌商岳揆
雞嶺而同歸茅藉磻溪與猴江而共致遜俗無悶因時
有待泊丹陵啟秩赤縣居尊迦維授手波旬革面十干
天子新朝帝釋之宮八萬仙人始向毗耶之國一音演
而荒景服三聖澄而禮樂備由是巴方舊彥蜀城遺老
仰慈門而知戶牖升福田而喜耕鑿雕鞍繡轄瞻鸞愕
而馳魂黼帶縵裾指鸚林而鶩款寶瓶宵注澗浹堯旬
玉塵晨麾風調舜歷咸以爲假沈其性迷生安視聽之

功動亂其心窮子失肌膚之戀江連巫峽始紆心猿山
對禺同終維意馬貞觀年中積閣黎等廼宣昭遺址發
揮精舍容成校歷揆日用於天經隸首陳章算神功於
地籙迴廊窸窣自吐風颯列榭崢嶸坐含雲雨圖竭宮
之妙質儼盧舍之真空寶珠周映銀龕備色逸多垂足
似臨兜率之天師利分身若赴維摩之境靈仙可接藻
繪無施真應難徵雕鐫有寄若乃巡積岨歷森沈天花
照而高月落地籟驚而幽泉湧紫蘭花徑香侵柏葉之
鑪綠草文茵影入芙蓉之座真童鳳策卽踐金沙仙女

鸞衣還窺石鏡巖莊轉梵杳冥松桂之墟磻戶栖棹寂
冥藤蘿之院法鼓奏而寒山曠洪鐘鳴而曉壑靜蘋苔
翠蘚具不盡之靈衣石乳瓊漿入無生之妙饌肅肅焉
遙遙焉信調御之珠庭而列真之甲第也爰有上座元
鑒法師等並六塵無我四諦非他奉乾越之微言守楞
伽之奧府法雷潛吼鼓動風煙慧日揚明照臨邱壑青
溪坐定見心宅之恒靈丹洞行忘覺身城之每化須彌
不動迴鎮閣浮閣岫安居下觀切利開四生之廣路敘
六趣之彝倫足以導揚真績恭宣來命者矣縣令柳公

諱明獻字太初河東人也太元降氣中黃授彩龔周魯
之榮基吐河汾之靈液四科高第振風翻於三冬萬室
崇班跼雲驂于百里旣而政成黎頌道洽毗謳假無上
之幽筌毗不言之景化絃歌在韻將寶偈而齊歸銅墨
成章與梵天而共貫瓊波湛淡沃蕩雲雷珠灌蕭條蔽
虧煙雨貞機罕應良談放好事之游朗調多奇高賞盡
名山之曲下走東臬事失南州塗窮歎孔席之栖遑笑
楊歧之浩蕩薄游茲邑喜見高人三接而定琴樽七縱
而擒風月林宗有道相期清濁之間平叔能言見許天

人之際從容宴語契濶曾懷欣性情之同冥感形骸之
共遣雖元都妙域已挂於忘言而義塾文場竊申于知
已敢作頌曰

妙象無倪神功有涉湛淡名器崩騰事業慧路翹車禪
河艤楫控引羣品輪迴庶刼縱橫宇宙反覆山川言因
境立道寄形詮爰稽福地式揆珍田丹溪漏日碧洞栖
煙閣都玉檻須彌石室榛灌溟濛風雲蕭瑟眸容乃眷
禪徒有謚葉磴三休花巖四密崇巒架殿疊嶂營樓干
楸鳳起萬棋鸞浮星開紺髮月湛青眸神宮不夜邃閣

長秋戶臨重嶸牕分絕嶺半漢香浮中天梵警鶴林聖
跡龍泉佛影鳥思山空猿悲峽靜森森巨柏落落長松
月出東岫霞生北峯山人自狎野老相逢白雲屢斷青
溪幾重彭澤之令臨邛之客比德山藪重規泉石法宇
成言慈門致役糠粃吏隱薜蘿心迹吾生擾擾與道遑
遑殷勤頌詠惆悵津梁投功翠碣助化元場百年之後
苔蘚蒼蒼

王子安集卷十三

番禺林國廣初校
番禺沈葆和覆校

王子安集卷十四

碑

梓州元武縣福會寺碑

若夫考龍圖而括運撫麟筆以傷時天地閉而賢人隱
周孔逝而微言絕豈非太階無象三辰鮮道敘之因滄
海為陵百川有橫流之勢况乎法身長往顧糟粕以空
存化迹繁流仰舟航而遂遠雖復功推八正猶迷鶴樹
之談道亞三明未覩龍宮之籍則有妙音難遇瞻雪嶺
而投軀真諦希聲仰雲山而破骨優填企景新雕白玉

之龕般若尋風舊化黃金之像三千寶座迥出天宮八
萬珍臺遙臨淨域非慧圖之冥感孰能臻於茲乎福會
寺者隋開皇中之所建也爾其峯巒霧列東分井絡之
光樓雉雲橫西覩禺同之奧北彌豐邑里開千堯南控
平江波潮萬里擁亭臬之絕勢昇林野之殊形肇開脩
竹之園式揆旃檀之刹法川高闕慈宮峻敞文璫寶綴
環日月於重廊翠栱丹楹起虹蜺於複殿眞容俯映福
衆爰依梵筵交燭禪房互啟山神獻果還栖交露之臺
天女持香卽遶飛花之閣輪輝夜滿抽紫焰于金山毫

相晨臨發珠華於玉地爰有縣令柳邊河東令族大業
之年來光上邑高人捧檄功爲銅墨之先令宰鳴琴課
稱絃歌之最眷香城而惻念披道肆而驚魂示懷延獎
思宏末教乃於寺內起重閣一所乘煙置臬揆日端繩
層榭三休凋簷四注奔星掛廡混珠網而同歸明月窺
軒雜璿璫而其貫仍抽麗筆俯刊貞琰詞源迅委振法
海之波瀾義宇宏深接禪宮之閭奧昔者陶潛彭澤罔
聞仁祠之風潘岳河陽未入菩提之域兼其美者蓋在
我柳君乎俄而帝隋方否三宮失龍鳳之圖皇業未昌

九野被豺狼之毒雖復餐砂茹石窺劍道而迴心蜂聚
梟騰指銅梁而革面自非法雲西捲潛銷火宅之氛慧
日東來迴朗昏衢之景則安能冥資福地顯阻魔軍波
清於振壑之隅燎息於炎崑之曲泊乎大鈞無事神器
有歸清玉戶而帝寰中轉金輪而王天下元場佛境與
天壤而惟新鶯樹鷄林共風雲而改旦功旣成矣時旣
貞矣紫宸有裕蒼朮胥悅都人狎至瞻雁塔而歡心野
老相趨尋鹿園而頓顙或至誠冥發爭知不盡之虛或
道恩旁流竟委忘緣之施乃于寺內造菩提塑像一座

實彭氏絕羣之迹洞參瑤銑體備丹青得埏範之奇模
盡陶甄之能事功分實相變八冥機丹果長春青蓮不
染靈儀若動似臨王舍城中神足疑行卽坐菩提樹下
銀牀地湧寶帳猶懸珍木天成金花不落總章元年又
奉爲皇帝更造八菩薩像成于淨境別峻崇堂而力寄
羣緣功難獨舉遂令眾情馳驚空懷更始之圖靈座端
巖未得安居之地時有宏演上人自丹烏下日昌帝籙
於明堂青鶴乘霄降仙苗於太室軒冕將風雲交映鐘
鼎與河山共遠法師夙成真諦幼挺殊姿拔五翳于長

驅登四禪於迴觀以爲德因時建澄什繼踵於西都道
莫人宏林遠隨肩於南國痛迷生之詭矯悲正覺之凌
夷思欲樹真氣於未萌緒崇因於已往遍游淨境歷聘
遐方至總章二年憩於茲剎身持寶印口出神珠心動
巴南化行蜀右法羅潛舉馴鳥性於慈林慧鏡旁開息
猿心於定水亦有情鈎五縛遙騰解脫之川想瘞六塵
迴拔沈迷之域名臣長者捐玉佩於銀庭善女靈姬落
金環於寶地貪機霧滌法施泉流林衡掄杞梓之材班
匠獻鈎繩之巧千樂電糾萬桶霞張飛陸緣薨層構架

景瓊缸沓照乘紺壁而宵分珠箔重華掩青疏而曉亂
紅葩植井彩綴河宮丹桂承梁香交列肆天倡梵樂肅
然切利之天藻蓋瑤瑤煥若摩伽之殿其精力之元感
而神化之曲成乎直歲寺主等州閭盛族鶯鷺榮因昇
慧圃而功成踐魔庭而戰勝排四門而獨往共極羣綠
攀十地而遐征同趨覺路縣令虞洽旌旗百代劍履三
朝匡帝座而南征擁台庭而北面星象垂祉川岳載靈
豫章七歲麒麟千里雄情負俗鬱王佐之宏圖英識邁
時得公門之逸氣旣而拂衣華族入天邑而觀光列板

仙臺出靈關而作宰泉魚狎夜多單父之深恩隴翟游
春嗣中牟之善政有條不紊施緩政於繁繩斷訟有神
下高鋒於錯節因以激揚大化潛滋比屋之封光啟令
圖預積攀輪之慕縣丞裴休家接朱欄譽流丹闕軒裳
照緒忠孝榮門鳥鳴有伐木之歌龍文非刈蓬之具高
材列務盛德分司翰墨不足留神琴樽申其獨往十旬
休沐奄有泉林千里邀迎乃疲風月青驪蹠蹠終噴玉
而懸雲素鶴徘徊且銜珠而犯露加以沈研有地題橋
八解之津誘勸無方叱御三乘之路故能使幽明仰德
法俗依仁攀海祇而如歸挹衢樽而下瞰鄉望等龜靈
高族驥子名家關錦室於中堂分綺疏于甲第或望雄
都鄙代列歌鐘或業預雲雷門藏璽詔文場促席有江
漢之英靈武觀連衡得岷峨之銳氣並能馳心彼岸欲
臨海而褰裳投足化城下悲思而反袂下官薄游江右
旅寄城隅懷道術於百齡接風期於四海依然梵宇欣
象教之將行莞爾公庭惜牛刀之遂屈雖文殊辨論妙
懸解而忘言而伯喈雄管敘真宗而罔愧敢巡此義乃
作頌云

金堤迴色玉峽長瀾城闕紛亂江山聳盤雲屯勝邑霧
啟禪壇右縈層雉左控崇巒竹園精舍檀山香閣萬栱
騰虬千楯跋鶴晚星疎翠朝霞泛牖鼓奏泉流鐘鳴霜
落時經失道代歷交呈神宮不撓法眾無驚金輪遠曉
玉鏡施明功昭佛刹化被王城帝圖冥運真儀濬發貝
齒含星流毫耀月鳥離山扇龍還海闕寶樹形留天宮
匠設爰有真人式宜慈主發迹江甸馳聲蜀宇望遠連
規攀澄襲矩力窮典道功周廊廡羣緣肝嚮眾福氤氳
叢楹列電高棟銜雲銀龕曙撫玉座宵分瓊璣有爛藻
繪多文鬱彼巖邑猗歟上宰松桂連華鴛鸞集彩禪津
有裕至公無待火宅可辭舟航斯在我之飄寓邈矣來
遊山川俯仰道義淹留承風郭外撰綴江幽元機勝筆
天地相周

梓州飛鳥縣白鶴寺碑

原夫玉都瓊室紫垣光大帝之庭金闕銀臺元壁壯羣
仙之域故能使神明有宅駕日月以長驅鸞鳳知歸撫
雲霓而上出斯則層巢墜穴上皇迷棟宇之尊考室靈
臺中古識巖廊之貴然後冕旒前序提四海以爲家登

步太階列千門而有閭况乎者山形見旁行草昧之先

原缺

光宅乾坤之右雖鶴臨西閼龍宮與王法同

亡而象化東流雁塔與遺儀繼起白鶴寺者蓋菩提寺
之餘址梁武皇之所建也香城福地之舊三巴五蜀之
湊裂岷山之奧域分井絡之榮光西包玉壘之墟北瞰
銅陵之野南肩列第門庭萬家東戶連峯岡巒千里實
伽藍之勝跡得迦衛之英模憑絕磴以圖規俯長溪而
作固自金陵不競玉鏡無章城池與南路之悲亭障切
北風之候崩山關水觸地網而三分墜月奔星劃乾綱

而五裂中原錯戾慈門爲虎豹之墟滄海橫流定水穴
鯨鯢之浦懷山旣蕩法眾咸淪林院榛蕪軒堂委寂遂
使悲生棄井堙玉甃於三泉歎積爲山移瓊峯于九仞
皇上攝千秋之寶連緒三聖之宏機挾宇宙而先神御
雷風而首出靈功不宰華夷沾共貫之恩至道無私霜
露得平分之序考禎圖於日慎寤寐同符稽妙冊于年
刀幽明合貺然後東巡巨鎮追六聖而撫寰中南面太
壇朝萬方而小天下皇威旣暢寶應齊歸川岳薦靈風
煙動慶丹烏抱日疑增帝閣之華素鶴低雲若赴仙庭

之會昔白魚黃竹業未峻於崇封赤雁芝房名不登於
梵宇爰徵瑞典肇錫嘉名重與般若之臺更起招提之
院金繩夕布綿秀嶺以開壇玉榜晨舒擁回峯而闢戶
爰有宏演上人者法門之秀士也行超常凍思越恒饑
悲淨域之爲墟喜皇波之普泛縱還舟於苦海驚浪旋
夷叱歸馭於邪山靈關非險於是淨財雲委真眾煙馳
如趨摩竭之宮似向毗耶之國縣令梁宏悅首加甄緝
縣丞梁敬一親昭施典上憑天旨爭開舍利之壇俯會
眾心競起須彌之座禹同故嶺石鮮堅華廣漢餘垆地
多疎斥事關經始人懷祗懼重階不就空思天室之氓
寶像無資未獲黎陽之士豈非冥期肸鬻功參造化之
外故能果脣閒發運眸周映貝齒含滋壙毫起照三十
二相臨玉座以相輝八十四儀擁金山而圓立層甍四
合爍奔電於丹楹複殿三休絡浮煙於翠幌因高積磴
疑遷倒景之臺架險連榮似立迎風之觀瑠簷競注縈
霧道以龍回繡栢爭飛僊雲衢而鳳矯寫歸禽于寶鏡
誤接朝鸞圖走獸于文璫疑栖夕兔雷霆蓄洩裁臨承
雷之間煙雨飛浮未出層巒之下耀丹青于菌壁妙跡

疑存炳銑鑿于蓮龕神輝自燭鏘鏘欄鐸聲傳桂葉之
風焰焰山爐氣結松陰之靄仰真容于始旦滿月晨昭
窺列棟于方宵長虹夜發香泉激溜有符溫淨之池珍
木成行無忝祇園之樹信煦尼之別府實兜率之殊庭
者乎愛友上座法師等情機藻瑩戒律圓明披玉笥以
研芳候瓊鐘而肅慮禪姿曉映依稀同雞岫之前梵唄
晨臨彷彿像魚山之曲縣令獨孤儉等或鵬垂待運終
燮道于中台或蠖屈求伸且毗風于下邑鄉望儀曹等
或鹽泉錦室家稱三蜀之豪或抱樸懷仁譽擁雙流之
美或以爲山川肆踐猶紀石于弇州陵谷生哀尙沈碑
千岬首况乎德因時盛慶流封拜之辰名爲功登事屬
文明之運豈可使瓚猷被物終昧燮于元機金字韜華
不題勳于翠琰敢作頌曰

睿塗茵藹靈機翕忽玉架天都金裁地闕法王利見香
城繼發雁塔齊雲龍宮瘞月長江近域廣漢遺居禪扃
共往梵宇全疎迹均梁後義切秦餘山川牢落榛莽邱
墟有聖聿興惟皇降撫因天因地爲雲爲雨日觀龍驤
煙壇鶴舉肇開嘉號重光淨土猗歟上土道場真政物

觀成章子來興詠土石呈彩人靈合慶寶座晨嚴金山
夕映紫微分殿青岑曜郭復岫縈樓攢峯跨閣月低璿
鏡星連寶鐸彩鳳將飛蟠虹未落森沈桂宇肅穆筠壇
花明柳砌葉暗朱欄溪留夏雪澗咽秋湍山虛梵冷谷
靜鐘寒法眾爰依禪徒戾止望風三蜀征塵千里頓首
元堦歸心翠屐業超有色功齊無始偉哉冥化妙矣能
仁去來均跡前後俱身寂滅爲樂般若爲因題芳翠琰
敢詣靈津

梓州通泉縣惠普寺碑

若夫元機默運披睿烈於三精素鍵潛融肇神功於萬
彙則有靈期肸蠁龜龍負河洛之圖帝緒氤氳賢哲舉
乾坤之策雖功懸日月終植軌于寰中業靜雲雷未逃
規于象外爾其譯雞林之寶偈詮鷲嶺之真圖抽紫玉
於禪山朗元珠於智水不生不滅光臨妙物之津無去
無來濬發乘時之契仗三明而獨運施洽平分據二諦
而同歸功超遠古故能使三千法界向風知衽席之師
百億天王聞道失巖廊之貴非釋迦之神化其孰能與
於此乎既而正法將隱微言不嗣應身既歿遺儀間起

恒星夜掩西天銜風霧之悲夢日宵成東漢肅壇場之
禮由是鹿園層敞象教旁流宜妙獎於希夷範靈蹤於
顯晦瑤龕寶座光華震旦之墟鳳刹蜺裳斧藻閭浮之
域莫寺蓋梁大同年中所建地分彭蜀嶺對岷峨憑廣
漢之遺墟籍隄爲之舊壤西馳峭嶠山連白雉之郊東
赴長川江走黃牛之峽崇墉却峙之勢庭衢四會勝里
九曲之分閭閻萬積危冠衮服參差軒蓋之前露渚風
畦隱軫亭臬之望是惟先鏡寶啟香城煥若神明恍同
化出紺壇煙屬疏絕閣而三休紫殿雲深徹迴廊而四

注重樂複棟霧緝霞張繡桷瑁檐鸞伸鶴跂珍臺控景
羲和獲練轡之因綺榭裁氛屏翳得停鑣之所連薨積
翠交玉鎖於星衢洞戶流丹綴金鋪于月竇垂珠網露
傍傾漢浦之琛列鐸吟翹上合鈞天之樂固以輪奐之
美冠真宰以先鳴雕範之奇告靈基而得雋乃造彌勒
下生像一座相好端足華資朗備貞觀末年靈暉繼發
房權匝曜疑連不夜之城戶牖皆明似出重昏之境自
非理參幽贊道叶冥機宣佛鏡于無方演慈燈于已絕
豈能寫丹青于實相妙色長存圖銑鑿于真容神光不

昧若乃時暄福地低落照于晴暉候肅禪房汎初華于
霽景千千寶樹若在雙林一一妙香仍清八味山聳僚
晚跂葉嶼而相鳴野燕迎晨拂花簾而自樂松楹秀蔓
曲成蘿薜之衣砌石生蓮直起芙蓉之座則有施身童
子戾止巖扃忍辱仙人來儀禪戶都人野彥希梵席而
投裾趙美燕姝望齋庭而繼履莫不青鳧委貫俱欣不
捨之壇紫貝兼明共化無緣之力故能使瓊形畫塔象
設年滋彩帙瑤箱龍編月久豈西周之道備南國之風
成者乎爰有寺主等覃機色外練迹塵間浴甘露于心

田集祥風于性宇栖情不二忽起初地之權授手大千
猶擁彌天之具縣令等或公侯百代元貂列駟之門或
文史三冬吐鳳迴鸞之客銅章墨綬任切臨人鐵印黃
簪功宣漸陸局牛烹而待價肆蠖屈以求伸揮鋒九仞
之隅作鏡雙流之外錄事抑元等丹軒紫袂家傳方面
之勳驥子魚文地列膏腴之右昔承隋運屢委天書爰
自皇初顓流帝禮等寶渝之奉漢類微濮之匡周咸申
白馬之盟並受飛龍之託故能遺風罔墜代濟其美望
重西南功宣法俗咸以爲絃歌小政猶象德而垂芳鐘

鼎微榮尚銘勳而作鑒况乎神威自在方傳宰匠之功
豈可棟宇常存不勒山河之贊爰託幽鄙奉揚徽猷敢
宣此義而爲頌曰

天地定位君臣作極道在巖廊功沾寰域尚清皇盼猶
歌帝力况我能仁惟神不測誕生迦室利見王城機罩
有應業會無生長驅定境振旅魔營恩兼動植勢絕隨
迎燕山傾仞鶴林埋景慧日西沈慈波東騁競窺靈相
爭參佛影月殿分城雲龕動嶺長江舊域廣漢遺區川
分潼峽塞接岷渝閭閻四會亭障威紆爰開寶地實控

名都霞牆百雉雲甍四住紫闕尋煙蘋樓結霧波流虹
起雷奔螭步網罩星鶉璫栖月兔靈機藻絳禪室安閒
珮金範玉舉翠浮丹神宮不夜虛室長寒光超有色既
出無端清露花徑飛泉葉戶澗綠苔秋山蒼樹古茫茫
庶類巍巍淨土鷺鷥同歸華夷共聚第一義諦寥廓法
門迹離生滅思舉乾坤情迷則復道在爲尊惟名與器
萬古長存

王子安集卷十四

番禺林國慶初校
番禺沈葆和覆校

王子安集卷十五

碑

益州德陽縣善寂寺碑

若夫玉繩高曜分寶歷于皇階金榜洞開導瓊暉于帝
幄雖復蒼梧北望湖湘盈舜后之歌綠苻西浮江漢積
文妃之頌未有激揚煩蔭栖妙果于香城揮發蓋纏樹
冥機于淨域則紫房丹室猶居燬宅之間朱紱瑤筐未
出塵籠之際我國家鳳翔元氣駕黃幄而層飛龍躍太
虛絕蒼根而止僊文皇帝以八才御歷光昇岱野之榮

文德后以十亂乘時恭贊塗山之業握仁王之寶鏡日月重光驅梵帝之金輪雷霆靜禳涅槃甘露承睿渥而宵流般若靈音雜祥風以晝引蛟臺層閣俄交震旦之墟月面星毫坐照毗耶之國善寂者蓋舊寺之餘趾梁武帝之所建也爾其碧鷄仙宇分絕障于金隄石兔遙源控長江於玉峽封畿四會龍垞舍衛之壇里閤三分鹿野經行之地洎蒼鷲上擊銅馬交馳祇園興板蕩之悲沙界積淪胥之痛火炎崑岳高臺與雁塔俱平水浸天街曲岸與猴池共盡山川隱嶙空傳鷲嶺之基權芥蕭條

非復鶯林之樹武德伊始君子道亨正皇極而撫寰中登太階而臨天下函關雲物更逢真聖之期井絡星辰重集會昌之運雖開基撥亂獄訟知歸而繼絕興亡經綸未暇先皇統業貞觀御宸奉文物于三天布聲名于十地參羅上下充橐籥于襟懷八部神祇薦圖書于掌握皇寶降地符昇含生無昏墊之虞法聚有來蘇之望俄而後庭遘厲椒房穆卜六宮震恐三靈愕眙馳瑤展幣有事于羣宗碧剡懸針無徵于眾術帝乃降鑒廻慮屏壁與珪追勝跡于靈關事良緣于福地爰紆聖綍重

啟禪宮峙璇刹于將傾鎮銀繩于已絕絲綸既洽棟宇
行周坤德用寧陰儀再朗于是林衡授矩周官詮揆日
之工梓匠揮斤荆客鍊成風之巧重楹畫棋坐出天霄
複樹文閨俛臨霓宇顯慶中縣令蕭君道宏理鉤繩于
日用憑藻纘于天成仙官之妙匠可尋盧舍之神模不
墜瑤蕤鶴翥曳珠網于星津繡桷虬伸吐璿璫于月徑
綠房丹瑣彩綴晴霞紫閣青疏光含薄霧春風瓊樹香
飄席上之蘭秋水銀塘影數軒中之芰晨光轉卉翻寶
字之龍花溽露低枝蕩真文于貝葉天童潤色黃珉碧

玉之壇海聖彌縫師子龍王之會建靈幢于厚夜琢飾
年深懸法鼓于迷津規模歲遠時又于佛堂東壁畫二
聖僧丹青未畢大啟神光鄰玉塵之崇輝發金龕之寶
相朱軒夕朗似遊明月之宮紺宇晨融若對流霞之闕
由是岷英蜀秀攀講序以雲趨帶燕裾鸞仰齋庭而霧
合貪機大阻淨施旁流綺羅分解佩之因軒蓋得捐金
之所靈妃翳日捨翠幄于香筵仙客停雲落霓裳于寶
地自非沖姿密契景應潛周豈能昭義祉于氤氳動元
機于屏嚮者也爰有上座宏一等凝妙律于神珠肅靈

椒于寶印太昊奉檝截苦海而橫流風伯扶輪歷邪山
而効駕騰燭龍于慧炬俯鏡重昏奏鳴鳳于天歌下清
羣籟摩珍在握遙臨七寶之宮正覺爲心俯闢三乘之
路湛衢罇于忍地品藻鷄園推水砥于言河扶持象化
縣令宇文某河南人也帝隋尚書之元孫皇唐侍中之
令子爾其虹旗萬里御六氣而鵬飛霜戟千羣擁三州
而鸚視帝葉皇枝之重對越乾坤金滕石匱之功光華
宇宙公上流提慶中和毓祉見鐘鼎于南鄰奉軒裳于
北闕雲姿月步下瑤澤而追風雪羽霞翎歷珠田而矯
霧芳蘭公子卽以地業高人幽桂王孫卽以琴樽待物
叙徽猷于禮樂則俎豆縱橫談賞契于林泉則煙霞咫尺
自裁聲百里揆化雙川收武城之故事擇中牟之令
典仁風易狎候丹籜於 垌惠化難經佇青鸞于曉隊
山巨源之遠量嘯傲行藏謝太傅之高風從容語默縣
丞王敬衣簪舊族孝友名家白虹絨抵鵲之光紫電蓄
衝牛之氣七年高秀拂層漢以非遙六月雄圖擊長波
而未遠鄉望等少承榮緒中區勝族門稱東別之標地
接西隅之嚮嚴君平之履道盛德家傳秦子整之談天

風流代襲咸以爲妙圖真諦事出于無名翠琰元碑道
凝于不朽弇州北跨猶疏駮驥之名文石東區尚勒元
龜之頌况乎玉衣流慶事屬于仙幃金屋延祥福纏于
梵宇爰求勝筆載記芳謠下官弱植少徒薄游多暇薛
蘿人事空餘江海之心筆札神交尚有淵雲之氣相如
謝病訪詩酒于臨邛邱也栖遲聽絃歌于單父羣公以
道之存矣思傳記德之書下官以文在茲乎願展當仁
之筆其詞曰

蜀嶺東漸岷山西積月峽星橋騰金孕碧胎靈兆邱
墟梵迹雁塔摧基鹿苑遺跡肅肅黃運英英文母配乾
垂慶儀坤握矩寵照香城仁沾淨土爰光大壯肆求多
祚青牛福地白鶴禪林重扇霧做複殿雲深龕雕翠玉
刹樹黃金龜鏡夕照鳳鐸晨吟慧樓彌望化臺出沒棟
列長虹牕虛明月果脣周映蓮眸間發雨霽猴池煙生
龍窟肅穆禪衆優游令宰方駕康衢連舟性海鷺嶺增
飾鷄林潤彩藻繪相尋丹青盡在我今懷矣窮路何歧
承風詠德展義陳詞百年心事十載風期東西南北栖
遑幾時

益州綿竹縣武都山淨慧寺碑

原夫帝機寥廓雲雷驅妙有之功正氣洪荒清濁構乾
元之象融而爲川瀆結而爲山岳五城韜海接崑閩于
大都八洞藏雲冠瀛洲于巨闕造化之所偃薄靈俗之
所啟處極緹油而縱觀咏頌寧殫出宇宙而高尋風煙
罕測是知玉卮無當遐荒非視聽之津金榜所存城闕
盡江湖之致何必九虯齊驚直訪銀宮八駿長驅遙臨
石室武都山淨慧寺者梁大清年中之所建也名山列
岳之舊仙都福地之湊黃龍負匣著寶籍于經山紫鳳
銜書蔭榮光于井絡須彌峯頂仍開梵帝之宮如意山
中卽有經行之地爾其盤基跨險列嶂憑霄日月之所
竄伏煙霞之所枕倚飛泉瀑溜蕩滌峯崖綠樹元藤網
羅邱壑飛廉作氣被萬吹于中巖帝頊司寒宅于霜于
北谷丹梯碧洞杳冥林岫之間桂廡松楹寂寞風塵之
表是稱英鎮實瞰崇岡閭閻當四會之街城邑辨三分
之地綿溪錦瀆下浸重巒玉阜銅陵旁分絕磴山川絡
繹崩騰宇宙之心原隰縱橫隱軫亭臬之勢頃以黃旗
夜徙紫蓋晨傾九服失圖三靈在疚奸臣躍馬據折坂

而吟雲壯士聞鷄擁陽關而嘯雨岷峨失險化爲鋒鏑
之場江漢橫流非復朝宗之國禪宇由其覆沒法衆是
以凋淪國家奄有帝圖削平天孽紫宸反照皇階卽敘
萬國順百靈朝幽顯再立華戎一揆燭龍韜景避堯日
于幽都雲鵬斂翼候虞風于晏海以爲軒階具美功窮
望禮之臺漢道兼宏力盡祈年之觀爰經寶地大啟祥
宮撫香象而高視鳴法螺而再唱龍垣淨土連帝道而
重光鶴苑崇基脫皇居而首出況乎山精舊壤下鎮偏
隅天帝遺墟上千躔次王舍城之宮闕白玉猶存給孤

獨之園林黃金尚在法物繇其大備盛德所以相尋株
兵奉天藏之圖泉女獻山祇之籍離亭合榭因岸谷之
高低疊觀連房就岡巒之曲直丹崖反照畫棋相臨綠
障斜煙雕簷間出豐隆曉震次複雷而悽皇列缺晨奔
望崇軒而愕眙于香寶樹自起風煙九乳仙鐘獨鳴霜
雪銀龕佛影遙承雁塔之花石壁經文下映龍宮之葉
虹生北澗卽掛新幡鳳下東岑還栖舊刹若乃尋曲岬
歷崇隈周行數里直上千仞蒼松蓄蓄吹臨絕逕而疏寒
黛篠防煙繞迴疆而結蔭春巖橘柚影入山堂秋壑芙蓉

蓉光浮水殿亦有山童采葛入丹竇而忘歸野老紆花
向青溪而不返山神獻果送出菴園天女持花來游淨
國實杳冥之祕訣託幽深之逸境豈直淮南桂樹誓得
仙家江左桃源終迷故老而已爰有寬閣黎者俗姓楊
氏其先華陰人也因官徙地家于綿竹山分太華水帶
長汾川岳會同風雲感召元經素論侍郎居八俊之英
綠綬黃軒太尉列三台之首法師玉函降彩金瓶探色
振八解之遙源踐三明之廣路靈機入證窮象載于初
髻妙諦因心釋羊車于弱冠三千法界由廣位而出無

明十二因緣自普濟而登彼岸宏宣誓願大振沈黎揮
覺劍而破邪山揚智燈而照昏室彌綸所被白馬盡于
禹同權漸所開黃牛至于嶠冢虔誠樂土憇影茲峯迺
以貞觀九年于寺西院立七佛堂一僧舍星臺動牖月
面分階彩鳳銜旒神龍負塔飛煙湧座龕龕切利之天
香霧成臺樹樹菩提之果朝散大夫行縣令清河張楚
親承妙業俯刊貞琰林宗有道伯喈無愧法師夙機少
悟應變多奇玉山中斷瓊林下雜支道林之好事語默
方融釋慧遠之高居風埃遂隔泊乎坐忘遺照返寂歸

真城肆颯然若遺空山黯而無色豈直巖枝泣血閭戶
摧梁而已哉縣令劉照彭城人也自礪山仗劍縮鳳歷
於雲臺春郊授鉞嗣龍圖於白水玉壘三分之胄下雜
公門金陵一霸之基旁參帝緒翠綫丹紱歷古今而先
鳴人傑地靈冠山川而得儁君膺岳瀆之秀挺風雲之
會昆溪劍鏑直照胸襟楚澤珪璋潛周履行魯恭明德
方昇漢輔之階潘岳能文且職河陽之縣仁徽可被闔
境仰其風猷威德所加百城疊其霜彩尙乃康莊妙域
光開不捨之壇舟楫愛河昭暢無生之業痛鶯林之殄

瘁悲象教之榛蕪爰命緝興式光泉藪虎溪龍澗近分
廬岳之圖金闕瑤臺更討瀛洲之記銘曰

武都仙鎮龍墟與域邑動香城山開淨國澗流百道峯
雲五色谷暗藤斜山高樹逼千楸鶴列萬拱星懸分林
構址接磴開塵臨階竹樹遶棟風煙龕前怪石塔下秋
泉綠崖疏逕青岑拒室霧道相縈煙房互出葉濃磳淨
花深嶂密鳥度難尋猿驚易失簷分石竇地絡金沙丹
邱抗月碧洞棲霞松開野路桂列仙家仙鑪柏葉寶座
蓮花砌因巖曲橋隨峯返果出天厨香來仙苑玉鑰啟

三三集卷一五
九
劉氏刊
曙金璫照晚谷思鐘張山悲鐸遠閭閻勝踐銅墨高情
聲飛別邑望動寧城懸金道肆刻石山楹千載之後于
嗟令名

梓州郫縣兜率寺浮圖碑

若夫仙樓白玉窈冥崑閬之墟神闕黃金寂寞蓬瀛之
浦斯則岡巒彷彿稽鳳冊而空存島嶼憑陵艤龍舟而
罕迨至若按皇軒于夏籙考璿構于殷圖周王北洛之
宮秦帝南山之閣西京故事下聽雷霆東國餘基俯臨
風雨莫不陵遷谷變共榛灌而邱墟火絕煙沈與雲雨

而塊莽其有據坤靈之寶位借神道之冥扶占象緯而
圖基揆川原而宅址蜂臺映月還臨舍衛之城雁塔尋
雲卽對者闔之嶺成而不毀者將斯之謂與兜率寺者
隋開皇中之所建也爾其林泉糾合之勢山川表裏之
制抽紫巖而四絕疊丹峯而萬變連溪拒壑所以控引
太虛蒸雲駕雨所以盪洩元氣涪江千仞波潮將旭日
淨光都城百雉蕤棟與晴霞共色信造化之奇模盡登
臨之妙境元房霧轉抗金樞于桂岳之前紺殿星開栖
玉刹于梅林之下巖花落沼近拂天衣澗葉低陰斜籠

寶座宵汀鶴警乘鼓吹而齊鳴曉峽猿清挾霜鐘而赴節若乃巡碧磴歷元階瑣牕澄彩瓊鋪洞照神姿滿月疑臨石鏡之峯眾馥揚煙似對香爐之岳信可下清人境上配天都爲勝地之先鳴執名山之右契者也爰有信弟子某乙等夙祛塵網早植慈根悲梵室之未宏悼禪居之猶褊以爲上棟下宇河圖避風雨之災廣榭崇臺時令著高明之宅是以菩提長者競潔舍衛之壇天帝人王爭闢仙宮之塔則知威容下麗羣生解瞻仰之因材樸重瑁黎人有子來之地乃于寺內建浮圖一所

某年月日鄉望等兆基宏願繼發淨因陵轍中天規模大壯高列砌架迴浮輕軒直上千尋周迴百步占氛候景神祇以自贊之功揆墨端行班倕逞絕羣之思收岱宗之杞梓聚崑山之玉石土兼五色金逾百鍊龍蟠萬拱策屏翳而高驤鶴矯千楣冠扶搖而獨運重簷靄靄雲將反覆于櫺軒洞宇寥寥風伯栖遑于戶牖仙娥去月旅方鏡而忘歸寶婺辭星攀圓璫而未返元薨湛霽若鵬飛之戾九天丹楹聯騫如鳳翔之據千仞每至韶光照遠爽靄晴遙列郊墟於四野開雲氣于千里風恬

雨霽煙霧藻天地之容野曠川明風景挾江山之助則
有瑠簾繡軸排淨域而停輪寶騎銀鞍指珍臺而聳轡
於是披岫幌抵巖扃攀翠複而三休步元梁而十憇廊
一作廓軒外做淑氣長延陰室中開鮮飆自激俯環瀛而
極望積蘇非遙出雲漢而高踐靈槎可託真福地之殊
觀香城之巨麗者乎寺主等沈研二諦振耀三明抵蒼
壁於邪山攬元珠於定水挹其流者曲成般若之緣承
其風者濬發菩提之願長史河東裴某風神朗潤操履
貞勤蕭條江海之心磊砢冰霜之節下岷關而叱馭寄

切全都臨蜀野而宣條功深半刺縣令衛元海內高流
河東望族榮高銅墨任屈絃歌浹辰而風化大行踰月
而姦豪屏氣陶潛彭澤自得高人王吉臨邛仍延重客
縣丞胡敬仁三河舊族一代良材提鎮鄒而願割踟躕
騶而待步江湖秋至方懷縱壑之圖海浪風高未接垂
天之翼鄉望等並中和受氣孝友承家才稱江漢之靈
地實岷峨之秀或以時良入選擢迹鄉鄰或以朝望來
儀升名郡縣並沐康衢之化俱承比屋之封瞻彼岸而
同歸登春臺而共樂咸以垣墉遠覆猶傳路寢之歌銀

鼎俄窮尙勒靈臺之頌况乎崇基奕奕與天地而爭工
層構戔戔配山川而永固豈可使宏規在我空存蔽日
之英雄筆同時不借凌雲之氣謹聞命矣乃作銘云
二象成紀三才定位開剖太虛導引元氣紛紛化迹颯
颯聖致行傑趣約歸同棄異法王西眷教迹東遊功超
道茂義冠儒流丹青旣備棟宇旋周梵宮霞積香閣星
浮緬想蓬瀛金臺迴起曠瞻崑閩瑤房峻峙壯矣名都
神居攸止大哉英服茲峯誕紀金繩對嶺玉勝分岑松
扃委鬱桂幌深沈雲龕樹晦煙洞花深重巒霧結複磧

泉吟肅肅禪眾遙遙淨境鹿野經文龍宮佛影梵臻金
室光來石井峽曉猿清池曛鶴警岷峨舊族江漢英姿
爭開法願重峻崇基占雲接廡揆景分墀天人合應幽
顯呈期靈思孤出神模獨湧霧積千楹霞張萬栱玉牖
星羅璿璫月擁複榭龍蟠重甍鳳聳戔戔峻岳奕奕崇
標瑤簷切漢寶綴凌霄深窗闕景洞戶流颯銀缸夕映
珠鐸晨搖我辭秦隴來游巴蜀勝地歸心名都憇足甫
逮鄉縣頻移灰燭聿從良時仍尋妙躅曠望原陸周流
江汜桃李春風芙蓉秋水煙霞四面關山千里他鄉寓

三十安集 卷十五
目茲焉復幾

梓州郫縣靈瑞寺浮圖碑

若夫神州括地震中分五嶽之圖巨壑浮天海上擢三山之秀造化之所樞紐靈仙之所窟宅故得昭灼天漢發揮雲氣牛頭山者卽廣漢之名峯也圓裔幾乎數里直上逾乎百仞若乃巖泉銑石之什風煙草木之狀傾九圍而得雋環四時而競爽蒼岑隱嶙旁分玉砌之階碧洞透迤下掬金陵之苑實羣聖之所託也隋開皇中王秀作牧益州來窺勝地首旌嘉號仍疏淨域因危裂

戶就嶺磴之成規跨險分榮借岡巒之迴勢工窮雕鏤妙出丹青飛棟神行迴蕙靈構又於山頂別建浮圖隋運告遷明皇首出軒疏凋昧基礎堙蕪奄興宜榭之施及柏梁之燼鄉望等馳心妙律夙契禪居悲梵宇之摧梁痛珍臺之絕構思宏法願重緝奇功黨集且千家惟巨萬以爲玉樓星峙稽閩苑之全模金闕霞飛得瀛洲之故事指香城而聳睇臨火宅而危魂參妙範于神明騁良工于宇宙飛廉按轡定樞臬於風衢羲和頓策揆鈎繩于日路雕簷畫拱韻迴紫漢之間複雷重巒鳳

舉丹青之外瓊扉暮敞推明月于金鋪繡栢晨開落繁
星于玉砌每至兩江春返四野晴初山川霽而風景涼
林甸清而雲霧絕沙汀送暖落花與新燕爭飛城邑迎
寒涼葉共初鴻競起則有都人襲賞憑紫檻而延衿野
客含情俯丹楹而極睇窮百年之後樂寫千里之長懷
信可以凜雪神襟清䟽視聽忘機意於紛擾置懷抱于
真寂者矣且勃旅遊岷徼漂舉涪鄉年晷一窮時灰七
變王陽西上方驚歛轡之心王粲南征實動登樓之思
我之懷矣乃作頌曰

大塊甄質名山作紀發地龍盤干霄鳳峙風雪萬邑岡
巒千里絕域天成珍臺地起揆剎元嶺圖基丹嶠層棟
崢嶸重簷窳窳有隋秦歷重明改照事與時遷迹從原
燎義均除舊事切爲新如或繼者代有其人聲飛隴蜀
望動州鄰爭開禪施競植靈因控險裁標循危列構巖
煙接廡峯雲對雷鐸運星衢璫懸月竇紫軒霧合丹梁
露透暮春疏節新秋戒序照滿暄郊氣銷寒渚樹濃鶯
亂川長雁舉流涕寫懷魂馳意與偉哉靈宇壯矣全模
窮高極麗遠覽長圖賞因時合筆爲神驅有情君子誰

為捨乎

主 鄒氏刊

[Faint bleed-through text from the reverse side of the page]

番禺林國賡初校

王子安集卷十五

番禺沈葆和覆校

王子安集卷十六

碑

廣州寶莊嚴寺舍利塔碑

昔者萬人疾疫神農鞭草而救之四維凋瘵夏禹刊木
以除之豈非物外其性則道功出事憇其和則任跡著
傍稽素篆仰叩元扉卽時義而規大覺因爨倫而佇真
諦向使三災克殄八正咸修人握戒珠家藏寶印則三
十二相不可得而視也八萬四千法不可得而聞也然
則聖人以運否而生神機以道喪而顯况迦維授手摩

叢雅居

竭推心高張妙用之功自拯橫流之弊蓋不獲已豈徒然哉故能業擁大千化形真一繇樂推而起七覺因來蘇而坐三昧發揮五演以寂滅爲身常提挈四流用慈悲爲化迹黑風宵遁波旬忘反噬之心綠沼晨開天常識問津之所括夷塗于九相蹇步其安納慧晷于重昏迷方自曉大矣哉應物而起興運而終至自於崑冥復歸於無物雖金沙晏駕雙林無可作之期而玉牒遺文六塵有經行之俗象法不可以無主微言不可以遂喪六千羅漢競結香緣五百仙人分開講肆星龕月殿俄

盈震旦之墟鳳利蜺旌坐遍閻浮之域屈伸闔闢其道矣哉夫寶莊嚴寺舍利塔者梁大同二年內道場沙門曇俗法師所立也其瑯琊貴族則漢庭峻節祖德猶傳梁甫高吟嘉聲未遠法師夙登真地深入慧門照果業於三明拂塵勞于八解羊車綺歲懸欣半月之詞鳳閣觴年已振彌天之響道惟堅固行乃頭陀百結斯安斥羅綃而罷御十珍雖貴對藜藿而甘心于時以丕應天人
人大宏緇侶法師至誠幽感獨步元宗豈直王公欽振錫之風固亦天子降同輿之禮寶瓶宵注則雨露隨軒

玉柄朝馮則風霜滿席既而素懷有在潛營擯俗之圖
爰定我居首托棲霞之寺爾乃巖開石霤邑跨金陵魚
峰多讚唄之權虎溪有送迎之限紫蘿山徑居藏勝緣
青松澗戶坐諧幽致枕石漱流者久之原夫見化有緣
應身欲謝昊天罔極追懷自遠故有諸天會聚共泣神
光列國交兵原缺譯求其致豈不深哉然則麟鳳下
靈猶稱瑞貺玉石微翫尚騰精彩亦有楚鐸淪照擢紫
靄以衝星周鼎沈華吐黃雲而噴景誠浩作者之述足
稱希代之貴况乎釋迦妙相如來真骨雖八萬四千之

寶塔散在羣方而九十二道之靈虹終聞間出立誠斯
應瞻庭廡而時逢非德不鄰歷山川而罕致是以優填
頓顙思存電下之光波匿投身願奉巖間之影粵在梁
武精求不暇以為秦登碣石而事止尋仙漢索瀛洲而
心非好善于是齋筵鳳設上祈切利之宮講帳星隨下
請龍王之藏輕齋棹海重賞梯山庶玉匣之全移幸金
棺之半啟以法師智遺人我識洞幽明思假妙因冀通
靈感爰承綸綽載踐滄溟過石門而右指歷銅標而左
顧乘桴月泝戒楫星沼相彼遐陬實惟荒裔一音演說

本承聽受之鄉五日繼明素隔照臨之域珍奇乃萃聖
 德攸傳則知有感必臻信覃幽境不行而至豈隔殊方
 法師既達國城式敷朝命受銑筐而頂禮撫瑤緘而跪
 發盡收其寶重載而歸亦猶珠匿敝衣須馬鳴而後用
 金藏陋宇待龍樹而方開梁氏之都妙算而仰神光家
 之繇也文苑英華注十四字疑有脫誤炎涼可質往反九十旬楫柁不
 輟風潮八千里以大同三歲屈于茲邑法師性豐幽澹
 質固虛羸綿歷是淹疲痾屢積維摩見病蓋伸方便之
 門道安謝歸思遠朝廷之事願居此刹有詔許焉仍分

舍利俾宏真福國惟甌駱郡實番禺爾其封疆跨躡之
 壯海陸會同之衝上當星紀下裂坤維階百越而鄰三
 吳軟雕題而陬交趾神仙氣色汀洲建不死之鄉舜禹
 精靈原隰現行宮之地閭閻霧撲士女雲流謳歌有霸
 道之餘毗俗得華風之雜蜃樓高峙猶埋又帳螺臺峻
 績尚識朝基信夷夏之奧區而仙靈之窟宅也此寺乃
 曩在宋朝早延題目法師聿提神足願啟規模爰于殿
 前更須彌之塔因緣盛力人以子來徵日官而正墨集
 風師而舉草育王奔令掃地尸而獻神兵梵事馳心感

天宮而下靈匠崇階遽積寶樹俄周不殊仙造還如湧
出故其粉畫之妙丹青之要璿基岌其六峙瑯闕紛其
四照仙楹架雨若披雲翳之宮綵檻臨風似遏扶搖之
路散華璫於月徑璧合非遙撥罽網于星潯珠連可驗
玉虬承雷倏雲竇而將騫金爵提霓拂烟衢而待翫瑤
窗繡戶洞達交輝方井圓泉參差倒景雕鏤備勒飛禽
走獸之奇藻繪爭開複地重天之奕懸梁九息良馬駿
走而未窮疊磴三休的盧騁健而知倦是棲銀柳用府
瓊函採舍衛之遺模得浮圖之故事爰自梁末以迄皇

初城邑屢新軒墀若舊雖復百魔蜩沸聽鼓鐸而懷音
六賊蜂屯仰椽藥而革面多迴淨施罕犯仁宮則知遐
吹所會斯同偃草慈雲所潤豈直流根故能比蜀守之
祠堂長爲典制均魯王之祕殿若有明徵宜其坐鎮一
隅俯炎荒而獨秀盤基有地冠終古而長存者乎國家
業擁太初事用皇極高祖以援危撥亂伏紫氣而登三
太宗以端拱繼明白黃離而用九皇上纘乾坤之合業
振文武之英風太階平而百度理中國定而兆人樂時
和歲阜邑頌塗歌以五刑不用六械徒設舟車四達難

論貢賦之差襟帶八荒非復華夷之隔天寶降地符昇
 木石甄社飛沈効慶雖叶和制變實賴文思之功而持
 盈守成亦資連帥之助大中大夫使持節廣韶等州都
 督李某早登清貫夙踐崇軒嘉猷迴發于天朝善政果
 行于朞月越谿仙鏐吐光芒而駭人岱嶺寒松排風颯
 以成性美哉稱繇功著鶻響徹于雲霄方為時須熊軾
 疲于道路廣陵單轂如送張綱渤海亂繩復思龔遂王
 尊卑蓋欣臨折坂之前吳隱朱軫更集貪泉之右高名
 夙著佛化橫飛羣盜屏跡而歸農姦吏聞風而去職京
 坻坐積固狂潛迴汲黯之卧淮陽直聞清淨王堂之居
 汝郡但舉賢良用能使檻穽不施猛獸巡江而遠竄市
 塵無擾商旅倍道而相歡颶風寢毒炎埃罷厲人稱有
 道家實無為加以援翰寫心自契真廉之旨高談見意
 不踰元默之津學究儒林真窮釋部知通人事且味禪
 宗道可以知歸物繇其顯會是歲也忽於此塔重覩神
 光玉林照灼金山具足倏來忽往類奔電之含雲吐燄
 流精若繁星之轉漢傾都其仰溢郭周窺士女幾乎數
 里光景動乎七重寶孟冬之日也觀夫至道不私瑞生

必繇乎樂國慶基有會福至必依於善人自非化足動
微教非飾迹何以發真如之盛契壯實相之輝華在昔
鳳集潁川宣后歸功於良守龍游湘浦章帝布德於賢
臣歷選前猷茲爲故實然後上和下睦主聖臣良滅火
返風雖有辭於進壤一作讓母修子應亦何愧于當仁至
於百越衣纓三闕父老或代傳篁竹氣推丹桂之城家
擅芝蘭名動蒼梧之野出平原而祛甲擁崇閩以鳴鐘
並爲蕃部之恩親覩招提之瑞同祈介福共潔齋壇磬
龍象於南州盡衣鉢於西竺會吞方丈供備孟蘭法鼓

振而沙界肅洪鐘鏘而鐵圍淨妙財爰捨法施爭流華
轂物於香城文駟填於寶廡鏗藏巨億更入僧田價直
百千還登佛座豈徒照車十乘列隋氏之明珠盈篋萬
金積大顛之寶貝而已朝散大夫守長史某地乘華緒
價擢名流豫章擢而成幹騏驥生而躡影山濤天骨無
情吏隱之間王衍風神自出塵埃之表自忝榮嶺海作
式瀛幽略其小術包其大體振溫良之逸步得毗贊之
宏綱布道移風善寵邦政歸休置驛獨守家聲然則野
老行歌雖致功於露冕藩君坐嘯固藉美於題輿化成

異壤抑繇同德故能道揚法教揮斤蓋纏家懷方廣之
恩人慕韋陀之學傳燈繼曠曳組成陰下逮府僚旁周
縣案並志薰修同希福慧可謂爾之教矣何日忘之者
平時有明威將軍行禹府折衝都尉李公天子之舊屬
朝廷之夙將也靈根自遠聖族多奇受睇盼於甘泉奉
衣纓于平樂青龍帶劍光超殿閣之榮白虎銜珠早陟
齋壇之寵自招皇誕作鎮邊城湟水樓船遂勞都尉灞
陵車馬尚識將軍魂驚斷雁之峯恩盡沈鳶之浦濡鱗
涸轍處定水而彌勤撫翼香林在窮途而更切頻光法

會薦委殊珍護持攸仰招提是屬其兆基也如此經綸
黼藻其大矣哉爰自上座寶綸等竝妙根宿植勝果將
圓翰飛般若之林高步檀那之舍慈衿密洞敬明月於
談筵智鐸相輝化繁霜於寶刃思琬琰式播徽猷弟
子家嗣太邱忝闔門之薄宦地連濰渙竊藻繪之餘工
爰託下才用旌高躅豈知仲宣旅泊方銜深井之悲長
卿罷歸空負凌雲之氣我之懷矣乃作銘云

太息頽運嗟呼失道德弊爲仁物壯則老繫猿情暗求
鴟計早赤水沈珠元邱墜寶皇矣妙覺蒸然應期宗深

微妙業與慈悲燃燈匡俗捨筏濟時涅槃不住般若無
思俯迹見生和光不滅色音雖昧規模尚切猗歟上人
穆彼維新智傾八藏心超六塵淒涼燬宅解脫迷津鴻
冥佇想龍蟄存身青蓋遺邦黃旗故服原隰形勢江山
重複礪戶秋明巖盤夜燭鼓鐘于宮聲聞于外聿求紫
闥言尋丹瀨絕域棲遑驚濤顛沛至誠冥感神珍顯會
甄陶設險異軫疏源尉陀餘國盧循一作尋舊邊邑居雄
盛人物殷全是惟樂土寔曰龍川護持靈刹莊嚴寶塔
基構鼎新亭樂櫺業奔日宵排歸雲曉納架壁三休連

蕞四合分惟星紀境控天池棟宇綿邈津推移神機
不應瑞景潛儀光合玉廡彩動金枝凡我僚庶同嗟權
實周顛情勤王濛思逸咫尺幽鍵往來靈室共蔭法堂
俱歸慧日四維信受三明宏益貝葉紛綸龍華鳥奕講
肆宏敞齋筵巨翼供引純陀飯迴香積天人合契幽顯
同心傾家奉賄破產移琛軒裳隻鶩纓佩交臨蘭薰習
遠檀那意深偉哉連率冲乎德化職重隼裳秩遵熊駕
酌貧貽則還消息詐道濟香城禎凝寶舍琳瑯什種杞
梓緇徒調輕僧會辨析文殊奔螭易失令鼠難拘願刊

貞琰永冠康衢伊我窮途欣茲勝謁文休泛海仲翔遊
越尚想知音有懷明發謬惟雅顧叨陪天骨爰抽弱翰
式敘高蹤孤音易竭獨賞難逢思起王粲悲生蔡邕豈
無章甫誰適為容

行狀

常州刺史平原郡開國公行狀

某州縣洪飗未翔靈鳳垂翼景雲不燭神龍宛頸豈非
時不可以苟遇道不可以虛行聖人作而萬物睹神功
資而百寶用是以山川倒徙太階懷息亂之臣天地乖

離元首仲康時之具則有得其數者於平原公見之矣

自星虹沓祉

一作

開寶歷於軒圖雷電竊冥載休徵於

魯讖龍驤鳳起霸圖存玉壘之雲紫蓋黃旗王迹著金
陵之野故得卿才表秀疊彩駢蹤卓蓋朱旛連州比郡
公侯必復子孫承百代之基餘慶不忘仁義應千齡之
運公鼎門疏照穴岫翔輝分嶽秀於樊侯稟辰精於傅
說折旋儒館以六藝為笙簧軒翥翰林用兩京為鼓吹
經邦化俗涉游夏之門庭減竈磨兵得孫吳之闔奧皇
天眷命聖武膺圖覩物懷人思功去罪寰中事曹參

膺執帛之榮閫外多虞周縹企中軍之寵見危授命藏
器及時攀鳳羽於九霄候龍顏於千里蕭王內寢頻獻
雅誠韓信齊壇屢遷優秩武德三年授中郎將俄遷大
將軍秦王統軍皇基肇闢天步猶難宸展應上相之榮
仙夢受中權之寄被廬講將寔賴宏圖今日僉謀先應
時望于時弄兵竊舉猶勤甲冑吞沙餌石尚阻河梁公
制變以奇盪除以殺七擒三捷之略緒著轅門拔旗穿
札之能勳在盟府五年六月加上柱國隨班列也剪桐
疏爵分茅建社下斷物土上格星躔唐虞著其升降周
漢明其損益所以羽儀帝室蕃衛王畿懲惡勸善庸賢
叙德高祖勳逾黜夏業擅戡黎置酒醴於南宮揚旌旆
于東府建皇帝之號安不忘危覽徹侯之籍榮而思報
以公乃誠匪懈原始要終望嚴雪而識寒松觀疾風而
知勁草九年封望都縣男貞觀元年改封縣侯文豹禁
旅實著趨雄清道啟行允茲多士自非譽高朝諷價重
人謠仍虧博望之儀必亂鉤陳之選公早陪戎律夙簡
帝心敷歷二宮當仁不讓授左衛中郎俄遷右虞侯率
葱山狄壤蒲海蠻馭信要服之外區乃匈奴之右地境

鄰地澤乘勁席而鵬騰郡邇酒泉候宵塵而鶚視天子
乃停旒側聽負辰晨驚振洪策于古今溢巖勳于覆載
將使八紘昭泰銀臺應益地之圖九縣平夷瑤水流尋
仙之駕貞觀某年授高昌道行營總管公道凝三略功
標五才逸氣縱橫雄精貫月象物而動鼓輦肅戰士之
容推信而行歌舞表將軍之德裏糧坐甲輕死等于鴻
毛投袂衝冠重義均于熊掌鑿空歸惠荒度來賓收鄭
吉之前蹤復張騫之故事廟堂頌德魏闕疇庸光贊六
條非公莫可某年授某州刺史尋以江淹奧域衡霍名
區楚情剽狡吳風澆競火耕水耨郡闕婺女之精竦劍
危冠人尋鱗諸之弊分宣演化卧理切于宸襟易俗遷
訛行吟佇于人望貞觀某年遷睦州刺史政刑不愆考
績連最俄授使持節松州都督今上鈞臺嗣歷鼎邑凝
圖百城勞晉武之心千里揚漢宣之詔璽書加秩禮綬
諸藩綸煥層班事高恒典永徽中改沙州刺史屬鼇山
亂德鴻冰稽誅扶桑落日之濱妖朋蟻結孤竹尋雲之
際孽黨蜂騰百濟遺黎記懸巢而斬氣三韓別種附危
幕而遊魂玉帳蒐兵佇責包茅之貢金壇令律將收堦

矢之琛龍朔年中授公熊津道總管公昔從幕府早廁
戎行覽兵法于軒轅受陰陽于呂望三門五壘得破敵
之奇謀火艦雲梯總行軍之妙法故得戰無全陣野靡
堅城縱金將躍馬暫臨銜璧與牽羊相繼豈惟秋方息
亂遙聞定遠之名春谷投心遐想度遼之策若斯而已
矣及三軍獻捷諸將論功帝嘉乃動作鎮炎野授公廣
州都督改封平原公以途鄰北戶地接南池珠崖魑魅
之鄉銅柱貪殘之境累藩斯寄歷任稱難于是受以春
風臨以夏日明冠婚于縣邑布庠塾于閭閻薤本誅強

奸豪屏氣棠陰察獄惇獨申哀理龔遂之亂繩解虞卿
之錯節黃霸得循良之譽績未銜于邊城陳湯有方面
之勲位不登于刺舉兼方具美其式茲乎朝廷以公屢
參伯牧駿歷班條吏不忍欺人無胥怨伏情馭極留連
稷野之童託義訓毗惆悵耶溪之老雖有黃槐紫棘無
以易堯盛嶽名都猶聞借寇麟德元年改授金紫光祿
大夫常州刺史既而天機忽爽大漸彌留白玉徒煎黃
金難化台階側席方膺雉冕之尊玉女停機俄逢鵲衣
之美以某年月日春秋若干薨于公舍嗚呼哀哉惟公

間氣呈姿靈和叶慶鳳鳴千仞鵬搏萬里情關峻遠得意于眾妙之門性宇沈凝忘筌于毀譽之境因心以至孝悌表于鄉閭臨義而行祿賜均于宗族故得虬驟一作

驥

雙屈服冕乘軒歸漢于締構之辰游梁于駭亂之際

章溝霧闢曳鷓尾而晨趨甲館煙開奉旌頭而夜警鳴輦出塞進李牧之奇誠露冕巡方受蘇章之直筆方當獻納黃屋揖拜青墀入東寺而掌壺處南臺而曳履不謂藏舟夜涉負杖朝興丹邱之化未尋元局之痛俄及故怨深徹樂悲纏罷市者乎謹狀

